

Feiing.

Sogn brann og redning iks utfører feiing av skorsteinar, og bustadtilsyn i kommunane Sogndal, Luster, Leikanger, Balestrand og Vik.

Tenestene skal utførast etter behov, og det er feiaren, i samråd med huseigar/bebuar, som avgjer kor lenge det skal vera til neste besøk.

Varsel om feiing.

Feiing blir vanlegvis varsla med SMS og epost. Kontaktinformasjonen blir automatisk henta ut ifrå kontakt og reservasjonsregisteret. Det er difor viktig at huseigar held denne informasjonen oppdatert. Er du usikker på kva som står registrert på di adresse, så kan du finna dette ved å gå inn på www.norge.no og «oppdater kontaktinformasjon». Der kan du retta viss noko er feil, eller leggja inn det som manglar.

Dersom det skal vera fleire telefonnummer eller epostadresser tilknytt adressa, kan du bruka www.varslemeg.no og velja «tilleggsoppføring». Dette er eit tilleggsregister der det er mogleg å leggja inn den kontaktinformasjonen du ynskjer skal få melding frå oss.

Når du har motteke varsel om feiing.

Når du har motteke varsel om feiing er det nokre ting som må førebuaast.

- Syt føre at eldstader er sløkte, og at dei ikkje har vore i bruk same dagen som feiing skal skje.
- Steng alle trekkreguleringar på eldstadane og spjeld på peisar. Viss ikkje dette er gjort, vil sot kunna trengja inn i huset ved feiing.
- Det må vera tilfredsstillande tilkomst for feiing. Huseigar er ansvarleg for at tilkomsten er god nok, og feiaren kan påleggja at dette blir utbetra viss det ikkje er det. Kva som er «godt nok» er nærare forklart i «Instruks for feiar om tilkomst til skorstein på tak».
- Viss feiing skal skje frå feieluke på loft, må det vera ein person til stades som representerer huseigar. Dersom tidspunkt ikkje høver, kan de ta kontakt med feiaren direkte ved å bruka telefonnummer som står i meldinga de har motteke.
- Dersom varsla feiing ikkje høver, vert eigar oppmoda om å ta kontakt med feiaren direkte via telefonnummer som står i motteken melding. Då er det enkelt å avtala ny tid.

Etter utført feiing.

Etter at feiing av skorsteinen er utført, kan feiaren utføra feiing av røykrøyr og ta ut sota frå skorsteinen, om ikkje huseigar ynskjer å gjera dette sjølv. Dette er, i likskap med feiinga, lovpålagt og er då inkludert i avgifta som blir betalt for feiing og tilsyn. For at feiaren skal kunna ta ut sota, må vedkommande ha lett tilgang til sotluka. Feiaren skal ikkje ta med seg sota, men plassera denne på ein branntrygg stad på eigedomen.

Feiing av eldstad er ei tilleggsteneste som skal fakturerast etter til ei kvar tid gjeldande sats.

Dersom feiaren oppdagar tilhøve ved fyringsanlegget som vesentleg aukar faren for brann, kan vedkommande leggja ned forbod mot bruk inntil feilen er utbetra.

Gebyr.

Feiing og tilsyn er ei lovpålagd teneste som skal finansierast etter sjølvkost. Dette vil sei at gebyr som vert kravd inn til feiing og tilsyn med fyringsanlegg, skal gå til å dekkja alle utgiftene med tenesta.

Dette vera seg t.d. løn til feiarstaben, bilar, kontormateriell og administrasjon av tenesta.

Når det er sagt er det ikkje høve for kommunen å krevja inn meir enn det dei brukar til tenesta. Det skal altså ikkje vera ein ekstra skatt til drift av kommunen.

Gebyr for tenestene som me utfører blir fakturert frå kvar einskild kommune, men er vedtekne med lik sats i alle kommunane.

Desse er oppdelte i tre nivå som er:

Feiing kvart år

Feiing kvart 2. år

Minstesats feiing og tilsyn. Denne satsen skal dekkja alle andre frekvensar.

Tilsyn (bustadtilsyn) er også lovpålagt og er alltid dekkja av gebyret.

Legitimering.

For Sogn brann og redning iks er det viktig at alle innbyggjarane skal kunna føla seg trygge på at dei får utført den tenesta dei har krav på. Difor skal de alltid sjå at feiaren:

- Køyrrer uniformert bil
- Har uniform sjølv
- Kan legitimera seg som tilsett i Sogn brann og redning iks

Behovsprøvd feiing

Etter at «forskrift om brannforebygging» vart sett i verk 01.01.2016, fekk kommunane litt endra oppgåver. Dette vil mellom anna seia at alt lovpålagt arbeid som feiaren utfører i alle norske kommunar skal vera behovsprøvd.

Det vil seia at feiaren tek omsyn til ymse tilhøve slik som sotmengde, sotttype og t.d. fyringsmønster når vedkommande skal vurdere kor ofte det bør feiast i kvart fyringsanlegg.

Dette betyr at nokre bustader vil få besøk av feiaren kvart år, medan andre får det sjeldnare.